

Soo Paul ka Mu Ephesus-witu-matoo Tubona

¹ Ka Paul-makoo mumme Te Pabe'e Jesus-wi tunaka'oedyukudu-matoo nabopu. Soo Te Pabe'e nuka netutzea ka besa tu unnepu mu numu e tuukwe tuunguna, ka Te Naa pumme meeoo netamma. ² Nu ka Te Naa noko Te Pabe'e-matoo mu nanesootuhikute umuoo mu sootuhina mu magwetzoikwu. ³ Soo Te Naa tubetse besa'yoo. Tamme ka Te Pabe'e-tuna oosoo no'oko hemma bebesow-ma te sootuha'e. ⁴⁻⁹ O'nosoo gisoo ka Te Naa ka teepu matabue oosoo te netutzease, mee tamme-witu netamma, "E Besaa Too'a saa'a Mu Pabe'e Jesus manedooa. Oosoo numu-koobattoo nabatsakwu. Nu saa'a gi mu tuma'emukwa-kwi mu neyugwedooa, soo E Too'a unu e soobedyana mu-koobattoo nabatsadoo. Nu saa'a yise mu tuma'emukwana soomu'wadoo. Nu mumme e dooamu e mayugwekwuna besa soobedya. Nu tubetse unu mu soobedyana besa mu sootuhikwu. Nu o'nosoo e tusoohanena gi mu numu tuukwe, pana meno'o nu ooka mu nakasopedakwadookwuna petzape, nu nobatu-ma mu sootuhikwu ka Nuga Besaa Too'a mu 'oedyukute. Umu saa'a ka nu'matoo e nanesootuhina mee unnedooa, 'Tubetse besa'yoo soo Te Naa tusooyugwena, soo Te Naa besa te sootuhikwu.' " ¹⁰ Soo Te Naa meeoo mooasoo tusoohanepa, ka teepu atasoo manikwuna oe manepetuse, oosoo no'oko hemma

nanano tuunoyugwe mayugwekwu yaa ka teepu-kooba manipetuse noko ka teepu pa'anakwatu tuwazoo soo Te Pabe'e yise no'oko hemma nemadabuepunnedooa. ¹¹ No'yoona soo Te Naa tusooyugwena ooosapa kaaheno manekena. Mooasoo soo Te Naa tunetutzeapu no'obatusoo numu tu dooamu tu mayugwegena ka Te Pabe'e mu naka'oedyukute. ¹² Soo Te Naa meeo tusooyugwe, "Nu e dooamu mu mayugwekwu. O'no yise no'yoona numu e tubetse besa'yoona sopedakwadookwu." Mooe'ugasoo numme ka Te Pabe'e naka'oedyukute. ¹³ Mu saa'a ka ne tubetse unnepu nakase o'no, yise mu Te Pabe'e naka'oedyukukwu soo Te Naa mu magwetzoikwutu o. Oosoo yise tu Besa Pooha-ma mu sootuhi, oo-ma mu kopokwu pummetusoo mu mayugwekwu tu unnekwa'nesoo. ¹⁴ Soo Te Naa ka tu Besa Pooha-ma te sootuhikwu, te tzapoonnekuna oosoo saa'a besa te magwetzoikwutu yise tu besa dooamu te mayugwedooa. O'no yise no'yoona numu, ka Te Naa tubetse besa'yoona sopedakwadookwu.

¹⁵ Nu meeo tuwazoo unakwe soo Te Naa tookwa tubetse besa'yoo nu nanabesa mu-kwitu nakapunne mu ka Te Pabe'e naka'oedyukuna, no'oko mu tunaka'oedyukudu soobedya. ¹⁶⁻¹⁷ Nu yise ooosapa ka Te Naa-matoo mu nanesootuhikute, mee'e nu unneyakwe, "U, Ne Naa ka Ne Pabe'e Jesus tubetse Naa. U tubetse naduyadu. U ka mu numu otuoo besa sootuhiyakwe. Mu yise besa nasootuhiyakwe. O'no umu besa u-kwitu nakasopedakwadookwu. ¹⁸ Umu u soo'oedyukukwu besa oo nakasope-

dakwadookwu, u, Ne Naa, numme netuseapu yise saa'a numme besa tunaka'oedyukudu sootuhidooa, numme u tuukwe-kwa'nesoo. ¹⁹ Umu oo sopedakwadookwu u, Ne Naa, unu pooha-gana ne magwetzoikwu, numme ka u naka'oedyukuna. ²⁰ U, Ne Naa, ka u pooha-ma Ne Pabe'e mayoda ka oo nabatsa-kwikoo. U, Ne Naa, nabaatoo oo bise, nawa'nesoo oo matabue.” ²¹ Meno'o manakwana soo Te Naa no'obatusoo poohabe mu numu-no ka Te Pabe'e-toohakwi manepunne mayugwe. ²² Te Pabe'e yise ka no'okosoo poohabe putooa ka Te Naa neyugwese oosoo yise ka mu tunaka'oedyukudu moohekwi. ²³ Soo Te Naa ka mu tunaka'oedyukudu-no nawa'nesoo manepunne. Soo Te Pabe'e no'oko hemma nanemamakwana nanemadabuena oo-toogoo te moohe.

2

¹ Ka o'nosoo umu gi Te Naa sopedakwadoo mu ka oosapa tuma'emukwana. ² Umu ka mu suda manedu numu-wa'ne'yoo yaa teepu-koobatu oosapa gi togekoo, ka sutakoo nakabetsea. ³ Tamme ka sutakoo podo mea ka sutakoo tookwa nakabetseana, tamme ka sutakoo besa sooyugwena. No'yoona tamme uga nanakwa'ne'yoosoo, suta te tumatuguna yise tamme-matoosoo namakodyukukwu. ⁴⁻⁵ Tooe tamme uga gi ka Te Naa napua'apana tamme ka oosapa tuma'emukwana, soo Te Naa unu te soobedya. Oosoo unu tutuha te soobedyana, te sootuhi. Tooe gi ooka te mapu'apunne sapa soo Te Naa ka Te Pabe'e-koobatoo te magwetzoa'e.

⁶ Soo Te Naa ka Te Pabe'e ya'ese oo mayodase oo-no soo Te Naa saa'a nabatoo te bikwu, o'no tamme tunaka'oedyukudu tuisse, te mayodadooa, yise Te Naa-baatoo te bikakwu tamme yise oo-no hemma nemadunagakwu. ⁷ Oosapa yise Te Pabe'e besa te sootuhinokwu ka putoohakwi te manese soo Te Naa tu tubetse besa'yoona te tzapoonnekukwu. ⁸ Tooe tamme gi ka tamme oo tunetammakuna no'oko mayohopana soo Te Naa te sootuhikwu. Oosoo te magwetzoikwu ka te tunaka'oedyukute. ⁹ No'yoona tamme gi mee'e nana'unne-wa'ne'yoo, "Numme nummesoo namagwetzoa'e ka besa tumatuguna." Soo Te Naa puusoo tamme sootuhikwu. ¹⁰ O'no oosoo gi te pudu manumudoose ka Te Pabe'e-toooha te mayugwe. Ka Te Naa tamme tunemadabuekupu ka besow podo tamme ka Te Pabe'e-no meano'okwu.

¹¹⁻¹² Mu gi Jew numu-nagatu-matu sakwa oo soomayu ka o'nosoo mu hownne'yoona. Mu Jew numu uga oosapa mee mu-kwitu wahayakwe, "Umu gi Jew numu, gi. Numme Jew numu suu'mu nanetutzeapu," mee'e umu. Ka gisoo Te Pabe'e yaa teepu-kooba petu, mu uga wakwawa'a. Soo Te Naa gisoo meeo mumme netamma, "Nu mu sootuhikwu," mee. Mu uga Te Naa gi sopedakwa-too, gi hownnekoo mu bi-wa'ne'yoo ka gi pumme mu sopedakwadoo. Mu uga gi Te Pabe'e-tu, soo Te Naa yise mu sukwe tsasoopedya. ¹³ Mu uga Te Naa-kwinga'a pana soo Te Pabe'e mu-koobatoo nabatsase, meno'o yise mu Te Naa doodooamu manepetu. ¹⁴⁻¹⁵ Numme ka mu gi Jew numu nabo'o'a, ka numme Jew tumayoho-too meana.

Pana soo Te Pabe'e ka ne moo'a tumayohopu kadoo ne mayugweku. Oosoo ne nananenaboana kadoo mayugwekese, no'obatusoo numu sumu-soo mayugweke, Jew numu yise mu gi Jew tuwazoo. Ka Te Pabe'e no'o-koosoo hekoobaatoo nabatsase. Meno'o yise tamme gi nanakwohonena, tamme nanapua'akwu. ¹⁶ Ka Te Pabe'e tamme-koobattoo nabatsase oosoo yise Te Naa pupua'amu te mayugwe, ¹⁷ Soo Te Pabe'e ka petuse no'oko te tuukwe soo Te Naa no'oko tu pupua'amu te mayugwe. ¹⁸ Ka Te Pabe'e nabatsase, o'no yise no'obatusoo numu ka tu Besa Pooha-ma sootuhi yise tamme no'yoona Te Naa-matoo nanesootuhikwu. ¹⁹ Mu meno'o gi Jew numu gi wakwawa'a manese, mu numme-wa'ne'yoosoo Te Naa doodoamu tamme no'yoona nanano ka Te Naa-baa natzepotugu.

²⁰⁻²² Meno'o tamme tunaka'oedyukudu tupe-wa'ne'yoo, ka Te Naa tubetse nanesootuhi nobe pumatoo namadabue-kwa'ne'yoo. Soo Te Pabe'e puu ka nobe-matu besa'yoo. Umu Te Pabe'e yadooawabe ka nobe pukooba katu-kwa'ne'yoo yise mu punno'o ka nobe-matuoosoo namadabuepunnedusoo. Oosoo no'oko nana-ma te totsagedukwu, sumuoosoo nanesootuhi nobe te mayugwekwu. Soo Te Naa tamme-naga nobega'yoo ka tu Besa Pooha-ma te sootuhise.

3

¹ Nu, Paul, nakwutuma ka Te Pabe'e Jesus-koobattoo, nu ka mumme gi Jew numu nanesootuhibu tuneyooena. ² Mu mooasoo e sopedakwatoo soo Te Naa e sootuhipu, ka Te

Naa pudu tunetammapu mu-toogoo besa'hoo mumme e tunedyooe tuunguna. ³⁻⁵ O'nosoo esoo na'unnepu gi haga oo nakadu ka gi numu natuukwe. Meno'o soo Te Naa Besa Poocha umu oo yadooawabe tuukwe ka pudu na'unnepu. u tuwazoo oo poocha nosepu ekow na'unnepu Te Pabe'e-witu. Meno'o yise mu oo nakasopedakwadookwu ka Te Pabe'e-witu, mu ka mu-matoo e tubona mesoo neana. Nu oo bo'o ka Te Naa nuka netamma-kwa'nesoo. ⁶ Meno'o soo Te Naa no'obatusoo Te Pabe'e naka'oedyukudu besa matugu namekoosoo mu Jew numu, mu gi Jew numu tuwazoo.

Oosoo te sootuha'e, tu dooamu te mayugwese no'oko sumu-kwa'nesoo te matabuedooa tamme ka Te Pabe'e-toohakwi'yoona. ⁷⁻⁹ Soo Te Naa e sootuhipu tooe gi e maawa'nekoo sapa no'oko tu doodoamu-nagatu. Oosoo e pooha-maka ka besa tu unnepu mumme gi Jew numu e tunedyooe tuunguna. Nu no'oko numu ooka nakasopedakwadoo mayugwekena soo Te Pabe'e yise mu sootuha'e. Soo tamme oo sootuhina no'oko tooe hemma tooe numu tusooyugwena oonakwa besa'yoo. Nu ka besa na'unnedu ka Te Pabe'e gi mobekwakwukoo gwetzoibu mu tuukwe. ¹⁰⁻¹¹ Soo te matabuepu no'oko numu e tuukwe tuungu. Te Manumudoopu uga mu numu gi oogow tuukwepu pana meno'o oosoo te tuukwe. Nagutza mooe ugasoo hemma-kobenasoo soo Te Naa mooasoo meeoo tusooyugwepu oosoo ka mu toha kakasa-gakoo meno'o tzapoonnekukwu ka unu besa tamme-too tu tusooyugwena soo Te Pabe'e no'okosoo sumusoo te mayugwekwu.

Tamme mu tzapoonnekute soo Te Pabe'e Jesus ka Te Naa unnepu togesapa mayugweke, tamme ooka naka'oedyukudu-nagatu. ¹² Meno'o tamme ka Te Naa mesoo nanetzakwiya'ena gi hemma-ma nasosui ka Te Pabe'e-ma nasoonatzina. ¹³ Tooe nu mu-koobattoo nakwutumase sapa mu sakwa gi nasootookepana. O'no mu mesoo natum-matzikwu.

¹⁴ Ooonne'yoona nu yaa nanesootuha'e ka Te Naa-matoo mee unnena. ¹⁵ "U No'obatusoo Numu Naa ka yaa teepu-koobatu nokosoo ebe tamme-koobakwitu tooe. ¹⁶ U sakwa ne pewu-kwitu sootuhi U Besa Poocha-ma. ¹⁷ U Ne Pabe'e oosapa numme-koobatu, umu sakwa ookow naka'oedyuku. O'no yise umu oosapa nana'unusoo nanasoobedyakwu. ¹⁸ Numme yise no'oko mu tunaka'oedyukudu-no oo nakasopedakwadookwu ka no'oko numme unu besa u soobedya. ¹⁹ U tubetse unu ne soobedya. Numme gi hownnekoo oo nakasopedakwadoo petu ka numme besa u soobedya. U tubetse unu besa'yoo. U sakwa besa ne mayugweke nawa'nesoo.

²⁰ U tubetse unu besa'yoo. U, Ne Naa, u Besa Poocha-ma besa ne tuyugwekute ka ne nanesootuhi, tooetoo ne tusooyugwena oonakwa besasoo. ²¹ No'yoona numme u naka'oedyukudu oo sopedakwadoo u tubetse besa'yoo. Oosapa yise no'yoona numme Ne Pabe'e-toohakwidu nanesootuhidu mee unnekwu, 'Soo Te Naa unu besa'yoo,' oosoo ka Tu Poocha-ma besa ne mayugwena."

4

¹ Yaahoo ka Te Pabe'e tummatziwabena, nu nakwutuma. Nu meeo mu tubetse netamma, mu sakwa ka Te Naa mumme tunetammakuna nakabetsea ka nasootuhi manese ka mumme oo netutzease. ² Oosoo ka besa nayadooadu te tuukwe'epu tamme sakwa gi numu oonakwa besa nasooyugwepana, gi nidyapupana oosapa nanatoo besa'yoona ka unu nanasoobedyaana. ³ Tamme sakwa sumusoo maneka. Tamme sakwa no'yoona ka Te Naa Besa Pooha nakabetseapunne. Oosoo no'oko nanakwa'nesoo tusooyugwe te mayugwekese, tamme besa nanamatoo sokwamakwu. ⁴ Tamme tunaka'oedyukudu no'yoona sumu'yoosoo. Tamme sumuoosoo ka Te Naa Besa Pooha nakabetsea. Tamme no'yoona sumusoo nanetutzeapu tamme yise no'yoona Te Naa-baa'yookwu. ⁵ Soo Te Pabe'e sumu'yoosoo ka no'yoona pumme te nakabetse'a. Tamme no'yoona sumu-wa'nesoo baa-wi namatzaka. Tamme no'yoona sumu-wa'nesoo tunaka'oedyukute. ⁶ Sumu'yoosoo soo Te Naa tamme no'yoona oo-matoo nanesootuhi oosoo no'oko hemma matabuepu, no'oko hemma nemadabuepu, no'oko te gwetzoimona te nemadabuekupuna tu pooha-ma te sootuhipu.

⁷ Tamme no'yoona sumu'yoo, pana soo Te Pabe'e nana'atakoosoo besow poohabe-ma te sootuhi tu sookwikwa'nesoo. ⁸ Ka Te Pabe'e-witu nabotugu-kwa'nesoo.

“Oosoo ka tu wohomu matzooekuse, oosoo ka Te Naa-baatoosoo kodyuka. Ooonne'yoona

oosoo numu nana'atakoosoo besow pooha sootuhipu.”

⁹ Oosoo tookwa ka Te Naa-baa'yoona yaa teepu-kooba petupu o'no meeo na'unakwe oosoo ka Te Naa-baatoosoo kodyuka. ¹⁰ Meno'o yise oosoo ka Te Naa-baatoosoo kodyukase no'yonna hee yise namamakwu petu.

¹¹⁻¹² Oosoo nana'atakoosoo besow te Pooha-sootuhipu ka te nanatummatzikwuna te nemahanekuna. Susumudu oo yadooawabe, susumudu gi tunaka'oedyukudu Te Naa-witu tuukwemo'odu, susumudu numu nenoyukwedu. Pana no'oko mu tunaka'oedyukudu nenoyukwe ka Te Pabe'e unu mu naka'oedyukukwuna. ¹³ Tamme yise no'yoona sumusoo manekekwa ka Te Naa Tooa sopedakwatoona, nanakwa'nesoo tunaka'oedyukuna. Tamme yise natzooepunnedukwa'ne tabuakwu, ka Te Naa tamme tunetammaku-kwa'nesoo. ¹⁴ Tamme yise gi waha-tamme tusooyugwekwu, tuha'a-wa'ne. Ka mu numu nemooagadu numme-baa petuse, tamme gi mu nakabetseapana tooe tamme mu too'e nemooaga sapa. Tamme gi oosapa te soonammena atasoo yugwe-wa'ne'yoo, gi nana'emota wumatzakadyipana. ¹⁵ Tamme kaaheno nanadyadooekwu, tamme ka unu nanasoobedyana. Tamme ka Te Pabe'e-wa'nesoo manekekwa. Soo Te Pabe'e o te moohekwudu ¹⁶ tamme yise oo-ma nasoonatzina nanatummatzikwu. Tamme nanano tuunoyugwe tamme ka nanasoobedyana. O'no tamme natzooekwu.

¹⁷ Te Pabe'e meeo mumme e tuukwe tuun-

guna, “Mu uga ka o'nosoo tuma'emukwadu ka umu gi tunaka'oedyukudu-kwa'ne. Mu sakwa gi oosoo manepana.” Umuoo gi tunaka'oedyukudu gi kaaheno tusooyugwedu. ¹⁸ Umu gi ka Te Naa nakasopedakwadoona. Oo-tamme wawkawa'a-wa'ne'yoo. Umu gi oo sopedakwatoo ka Te Naa tamme sootuhina, umu ka tusoomatzooena gi sootunaka'oedyukuna. ¹⁹ “Gi hownne'yoo tooe suta'yoopana,” mee sokwamadu. Umuoo suta tu tusooyugwena pedukudu. Umu tooe how tooe suda manakwe ka meeo sokwamana. Umu yise nana'unusoo suda manakwe.

²⁰ Mu ka Te Pabe'e-wi tunaka'oedyukuna, mu gi suta mu manena natunedyooe. ²¹ Mu ka Te Pabe'e tubetse unnepu naka. Mu ka besow po te nagekwuna natunedyooe, tamme ka Te Pabe'e-doodooamuna. ²²⁻²⁴ Soo besa oo unnepu tamme ka suta te manena tzadyooikute, ka o'nosoo te soomane-kwa'ne mee na'unnedu soo Te Naa pudu numusoo te matabuekwu. O'no tamme kaaheno tusooyugwekwu. Tamme besa nanamatugukwu yise ka Te Naa-wa'nesoo.

²⁵ No'yoona sakwa tamme ka suda te tuma'emukwana ma'wu. Tamme sakwa oosapa kaaheno nanadyadooe, tamme tunaka'oedyukudu ka no'yoona sumu'yoonasoo. ²⁶ Ka sutana, tamme sakwa yabesoo suta makwu. Tamme sakwa gi wuna'me sutapana tu yongomato. ²⁷ Tamme ka sutana, soo suta'yoo te matzooekukwu.

²⁸ Tooe haga tooe tuduhadu sakwa gi tuduha mane. Oosoo sakwa hemma natunedyuse hemma

howyugwe. O'no yise oosoo tooe hemma tooe ka mu tutuha manedu gea.

²⁹ Tamme sakwa gi suda yadooapana. Tamme sakwa oosapa besa unnena oosoo kumma'akoosoo numu tummatzi. Tamme sakwa ka besow mu tuukwena umu besa hanesootuhino. O'no soo Te Naa besa mu sootuhikwu. ³⁰ Tamme sakwa gi ka Te Naa Besa Pooha suda masoonammepana. Meno'o tamme oo sopedakwatoosoo Te Naa te kopose, oosoo yise saa'a te magwetzoikwu, oosoo ka Tu Besa Poohama te sootuhise. ³¹ Tamme sakwa gi nidypupana, gi sutapana, gi nananesootzemapana, gi tooe how tooe nanadyugwepana. ³² Tamme sakwa yise unu nanasoobedyana besa nanamatugu. Tamme sakwa oo soomu'wa ka numu suda tamme matugu, soo Te Naa puu te tuma'emukwana soomu'wa ka Te Pabe'e-koobattoo.

5

¹ Soo Te Naa unu te soobedyana pummesoo dooamu-wa'ne te matugu. Tamme sakwa oo-wa'nesoo. ² Tamme sakwa unu nanasoobedya ka Te Pabe'e tamme unu soobedya-kwa'ne. Oosoo puu tamme-koobattoo nabatsapu. Soo Te Naa besa soonamme ka Te Pabe'e tamme-koobattoo nabatsapu yise te tuma'emukwana oo-koobattoo soomu'wa.

³ Tamme sakwa gi kukumma'a-no nana'ahegoepana, gi moogoo manepana soo Te Naa doodooamu sakwa gi ooonne'yoopana. ⁴ Tamme sakwa gi suda apegeapana, tooe hayoo tooe unnepana, suda na'unnedu tuukwepana, tamme Te Naa doodooamu sakwa gi suda

apegeapana. Tamme sakwa ooosapa besa apegeamo, mee unnena, “Te Naa tubetse besa'yoo.” ⁵ Tamme oo sopedakwatoo mu Te Naa-no Te Pabe'e ka teepu atasoo yugwekwuse. Soo Te Naa mu moogoobu numu no'oko nana'ahegoedu gi ooka mu ma'wu, umuoo gi sootuhikwu, umu gi oo-no'yookwu. ⁶ “Gi hownne'yoo ka tuma'emukwagonnopana,” mee'e mu nemooagana, mu netammakwu. Umuoo gi naka'oedyukupana. Soo Te Naa ka sutakoo umu-matoosoo makodyukukwu no'oko mu gi tunakabetseadu umu ka tuma'emukwakena. ⁷ Tamme sakwa numu nemooagadu sukwe tsasoopedya.

⁸ Tamme-notu toganopunne uga ka Te Naa gi nasopedakwatoo, tamme togaba-witu-wa'ne'yoo. Meno'o yise tamme oetu tabuakute, o tamme ka Te Naa-witu nakasopedakwadoose. Tamme sakwa Te Naa dooamu-kwa'ne besa oetu nakasopedakwadoo. ⁹ Tamme ka Te Naa-witu nakasopedakwatoona, tamme sakwa besa'yoonaa kaaheno ka Te Naa podo besa meadabe. ¹⁰ Tamme sakwa ka Te Pabe'e tamme oo soomane tuungu oo-ma sokwama tabua.

¹¹ Mu gi tunaka'oedyukudu tooe how tooe manakwe, umu ka gi Te Naa-witu nakasopedakwadoona. Tamme sakwa gi umu-ma tzabepana. Umuoo sakwa mu neda. ¹² Ka umu gi tunaka'oedyukudu suda watze manakwe umu-ma nasookwina gi oo wahapana. ¹³⁻¹⁴ Tooe ka togano-wi sapa, hemma gi pepesow nawatzetugu ka oo-koobattoo tabedooakese numu oo mesoo poonne. Ka te nanesootuhi hoobea-wa'ne oo na'unakwe:

Umu utu'idu sakwa tubonne. Umu tuiipu sakwa yozu, soo Te Pabe'e ka taba mu-koobattoo tabedooapunnedu-kwa'ne'yoo.

¹⁵⁻¹⁶ Tamme sakwa unu sokwama manekese, besa kaaheno oosapa maneno. Tamme sakwa oosapa besa ka tamme tu sootuhipu-ma maneno. Mu numu meno'otu ewa suda tuma'emukwa, umu ka gi sosokwamana. Tamme sakwa gi umu-wa'ne manepana. ¹⁷ Tamme sakwa unu sokwamana ka Te Pabe'e tamme tunetammakuna nakasopedakwattoo. ¹⁸ Tamme sakwa gi baagoepana, soo nahebedu kadoo'oo te mayugwekwu. Soo Te Naa Besa Pooha sakwa te tunemadabueku. ¹⁹ Tamme sakwa besa nanadyadooena, nanesootuhi hoobea nananekwuhukuna. Te soonamme-kwikoo puusoo hoobeadoona. Tamme sakwa too ka Te Pabe'e-mattoo tune kwuhu. ²⁰ Oosapa tamme sakwa nanesootuhi ka Te Naa-mattoo, mee unnena, "U besakoo ne sootuhipu ka Ne Pabe'e Jesus-koobattoo. U tubetse besa'yoo."

²¹ Tamme sakwa punno'o nananakabetsea tamme ka Te Pabe'e nakabetseana. ²² Momoko'ne sakwa pummesoo koomamu nakabetsea Te Pabe'e-koobattoo. ²³ Mu nanana sakwa tu nonodukwamu nemadabue, ka Te Pabe'e tamme tunaka'oedyukudu nemadabue-kwa'ne. Oosoo te magwetzoa'e. ²⁴ Mu momoko'ne sakwa oosapa tu koomamu nakabetsea tamme tunaka'oedyukudu Te Pabe'e nakabetsea-kwa'ne.

²⁵⁻²⁶ Mu nanana sakwa ka tu nonodukawamu besa soobedya ka Te Pabe'e tamme tunaka'oedyukudu unu soobedya-kwa'ne. Oosoo unu te soobedyana tamme-koobattoo

nabatsa, O'no soo Te Naa te tuma'emukwana soomu'wakwu. Besa tu nayadoo-a-ma ka baa-wi te matzakase, tamme gi totsabu ka manekwu. ²⁷ Oosoo tamme tunaka'oedyukudu nemabetsape ka saa'a naa-baato te bikwuse. Oosoo besa te mayugwemena, gi ma'emukwadu, gi totsadu. ²⁸ Ka Te Pabe'e tamme besa soobedya-kwa'ne, nanana sakwa tu nonodukwamu soobedya. Tamme sakwa te nonodukwamu soobedya tammesoo nasoobedya-kwa'ne. Tamme ka te nodukwa-no sumu'yooosoo. ²⁹ Numu puu no'yoona pummesoo tookoo namakana mabetse'a. Tamme sakwa te nonodukwamu mabetsea ka Te Pabe'e tamme mabetsea-kwa'ne. ³⁰ Soo Te Pabe'e oosapa te mabetsea, tamme puu oogowsoo tookoo-wa'ne'yoo. ³¹ Mee nabotugu, “Soo nana puu tu naanapua'amu-baa'yoona mea, oosoo tu nodukwa-baa'yookwuse. Umu waha'yoo numu sumu'yooosoo numu-wa'ne'yookwu.”

³² Esoo na'unnepu togesapa na'unnedu tamme ka Te Pabe'e-no sumuooosoo numu manekwu.

³³ No'yoona nanana sakwa pummesoo nodukwa besa soobedya ka tammesoo nasoobedya-kwa'ne, no'yoona momoko'ne sakwa pummesoo koomamu nakabetsea.

6

¹ Mu doodooake sakwa tu naanapua'amu nakabetsea, ookow soo Te Pabe'e besa'yookute. Oo manenona besa. ² O'nosooo soo Te Naa meeo te tunetammakupu, “Mu naanapua'amu nakabetsea,” mee'e. ³ Soo Te Naa te sootuhikwu ka tamme tu tunetammakuna podo te tumayohono, mee

yise te netamma, “Mu gi tuoebuna, besa sokwamana, wuna'metoo momokwu eka teepu-kooba.”

⁴ Mu nanana sakwa pummesoo dooamu besa mabetsea yise ka Te Naa unnepu mu tunedyooeno. Umu sakwa gi nidya noko mu manaanapana.

⁵ Mu hemma how yugwedu sakwa mu pumme nedyawena nakabetsea, umu puu ka hemma how yugwenaka Te Pabe'e nakabetse'a. Umu sakwa gi sukweapu ka pumme nedyawedu nakabetseapana. ⁶ Umu sakwa gi ka pumme nedyawedu pumme poonnepunne suu'mu oo nakabetseapana, ka besa oo masoonammena umu sakwa oo nakabetsea ka Te Pabe'e meeo pumme netamma.

⁷ Ka kumma'akoosoo numu tummatzina tamme sakwa besa oo soobedya. Tamme ka Te Pabe'e tutummatzina, ⁸ tamme oo sopedakwatoosoo Te Pabe'e no'obatusoo numu besa manedu besow tamme-matu makodyukukwu: namekoosoo ka hemma how yugwedu oo nedyawedu nokosoo.

⁹ Ka hemma how yugwedu sakwa soo oo nedyawedu besa matugu. Umu sakwa gi mu netzakwikupana, umu oo sopedakwatoosoo Te Naa mu nedyawedu. Soo Te Naa gi numu tutze'a.

¹⁰ Yow nakwitoo mumme e netammakwuna, e pupuamu. Tamme sakwa unusoo tunaka'oedyuku tamme ka Te Pabe'e doodooamuna. Oosoo nana'unusoo tunaka'oedyuku te mayugwekwu. ¹¹ No'oko ka Te Naa tamme pooha sootuhipu-ma, tamme natzoo'e, tamme sakwa ka sutakoo matzooekuno tooe ka sutakoo tamme ma'emukwa sapa. ¹² Tamme

no'obatusoo sutakoo poohabe gi tabuadu-no nanamabetukute gi ka sukwe numu-no. ¹³ Tamme sakwa namabetzapepunne ka sutakoo matzooekukwuse. O'no ka tamme-baa oo petuse, tamme oo matzooekukwu, ka Te Naa tamme sootuhise. Tamme sakwa namabetzapepunne ka soyuzu-wa'ne, oosoo puu namabetzapepunne numu-no nagoekwuse: ¹⁴⁻¹⁵ Tamme sakwa ka kaahenodu sopedakwatoo, kaaheno tusooyugwena, oosapa kaaheno ka Te Naa besa podo meadabekwu tamme ka besa na'unnedu naka'oedyukuna soo Te Pabe'e te magwetzoikwu. ¹⁶ Ka sutakoo tamme wohone tooe niwunudu hoa-ma te kwatesangepana, ka oo petuse, oosoo gi how te yugwe-wa'ne'yoo tamme ka tunaka'oedyukuna. ¹⁷ Tamme gi how nuugwe-wa'ne'yoo, tamme ka oo sopedakwatoona ka Te Naa tamme magwetzo. Soo Te Naa Besa Pooaha ka oo unnepu-ma te sootuhi. Ekow na'unnepu-ma tamme sakwa ka sutakoo matzooeku. ¹⁸ Tamme sakwa oosapa nanesootuhina nanetzakwiyo tuwazoo, ka Te Naa Besa Pooaha-toohakwi. Tamme sakwa oosapa namabetzapepunne no'oko mu tunaka'oedyukudu nanesootuhikuna.

¹⁹⁻²⁰ Nuka tuwazoo mu sakwa nanesootuhiku, nu yise gi nasookwina ka Te Pabe'e-witu mu numu tuukwekwu tooe nu oo-koobattoo nakwutumase sapa. E nanesootuhiku nu gi suina mesoo yadooakwu. Soo Te Naa yise tu unnepu-ma e sootuhikwu o'no yise ka Te Naa besa unnepu mu numu nakasopedakwadookwu.

²¹⁻²² E besa pua'a Tychicus mee naneadu ka Te Pabe'e tummatzidu, nu oo-ma nasoonatza'e. Nu

mu-matoo oo ta'ya. Oosoo ka mu-baa petugase, oosoo no'oko hemma mu tuukwekwu ka how e manepunnena. Oosoo mu nenoyukwedooa.

²³ Nu ka Te Naa noko Te Pabe'e-matoo mu nanesootuhikute mee unnena, “Mu numu sakwa besa nanasoobedya umu ka tunaka'oedyukuna. U sakwa umuoo tunaka'oedyukudu magwetzoi. ²⁴U sakwa no'oko numu ooosapa ka Te Pabe'e Jesus besa soobedyadu sootuhi.”

Te Naa Besa Unnepu
New Testament in Paiute, Northern (US:pao:Paiute,
Northern)

copyright © 2012 Wycliffe Bible Translators, Inc.

Language: Paiute, Northern

Translation by: Wycliffe Bible Translators, Inc.

Paiute, Northern [pao], USA

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Paiute, Northern

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

74e6207a-2a9c-5dcd-bc2c-f05c6aafd4f4